

PAGTULON-AN 12 – ILALUM SA KASUGOAN DIHA SA DALAN SA SAAD

Numeros 8 - 14

TEMA: Sa pagpakita nga adunay usa lamang ka Tigpataliwala sa mga tawo ug sa Dios.

Nahadlok ka ba sa pulis nga nagalakaw duol sa imong balay? Dili ka angayan mahadlok kon ikaw nagabuhat ug maayo, apan pananglitan siya miabut sa dihang nagabuhat ka ug butang nga supak sa balaod. Usa ka bata nasakpan nga nangawat ug bisikleta. Ang pulis midala kaniya ngadto sa estasyon sa pulis, apan sa maong higayon miabut ang amahan sa bata. Ug nagpakiluoy ang amahan sa pulis nga buhian na lang ang bata ug misaad nga iyang atimanon ang silot sa bata. Busa ang bata nakalingkawas sa pag-atubang sa korte ug sa pagkabilanggo. Ang iyang amahan nahimong tigpataliwala alang kaniya; siya mao ang *nagpatunga* sa bata ug sa silot sa balaod.

Atong makita sa magapadayon kita sa pagpanaw sa *DALAN SA KINABUHI*, nga ang Israel usab nagakinahanglan ug tigpataliwala. Adunay mga silot nga nalambigit sa pagsupak sa Kasugoan. Adunay dagku nga mga panalangin sa Israel kon ang kasugoan ilang pagabantayan, apan aduna usab daghang mga tunglo ngadto sa Israel kon ang mga sugo ilang pagasupakon, Deuteronomio 28.

Human sa paghatag sa Kasugoan didto sa Bukid sa Sinai, ang Dios mihatag ug pahimangno mahitungod sa halad sa pagpasig-uli nga diha sa ibabaw sa arka-sa-pagpamatuod taliwala sa duha ka mga kerubin, Numeros 7:89. Ang arka-sa-pagpamatuod atua sa labing Balaan nga Dapit, ang tinago nga dapit sulod sa tabernakulo. Ang Dios misulti kang Moises sa paghinlo sa mga Levihanon alang sa pagkasacerdote nila, Numeros 8:5-22. Ang pagtabon sa panganud sa panahon sa adlaw ug ang pagpakita sa kalayo sa gabii, mao ang nagagiya sa mga tawo sa Israel, Numeros 9:15-23. Ug ang pagbuhat ug duha (2) ka trumpeta nga salapi nga ginapatingog dili lamang sa panagtigum apan alang sa paglakaw, pagpakiggubat ug mga piesta, Numeros 10:1-10.

Ang mga Israelitas mibiya gikan sa kamingawan sa Sinai ug miadto sa kamingawan sa Paran, Numeros 10:11-36. Nagabagulbol nausab ang mga tawo; sa dihang nakadungog ang Dios, ang iyang kasuko misilaob, ug ang kalayo ni Jehova misunog kanila. Si Moises nagaampo kang Jehova ug ang kalayo napalong. Busa ang ngalan niadtong dapita gitawag nga Tabera, tungod kay ang kalayo ni Jehova misunog kanila, Numeros 11:1-3. Si Moises mao ang *nagapataliwala* sa Israel ug sa nasuko nga Dios.

Sa diha nga ang unom ka gatus ka libo (600,000) nga mga tawo nagalakaw (Numeros 11:21) ug ang uban pang mga tawo miadto sa Hazeroth ug mipabilin didto, si Meriam ug si

Aaron nasina sa ilang igsoon nga si Moises. Ug tungod kay sila nanglibak mahitungod kang Moises, si Meriam nagkasakit ug sanla. Unya si Moises mitawag ngadto sa Dios alang kaniya ug naayo siya human sa pito (7) ka adlaw. Si Moises nahimo na usab nga *tigpataliwala*, Numeros 12.

Ang Israel nagkampo didto sa Kadesh ug nagpadala si Moises ug mga maniniid ngadto sa yuta sa Canaan. Siya mipadala ug dose (12), usa sa kada tribu. Human sakwarenta (40) kaadlaw, mibalik sila nga nagdala ug mga prutas ug sa ilang mga taho. Ilang gipakita ang prutas ug nanag-ingon, “Tinuod nga ang yuta nagapaagay sa gatas ug dugos, ug kini mao ang bunga niini.”



Tinubdan: Sweet Publishing – kini ilustrasyon lamang sa Numeros 13:1-3

Apan nagsugilon usab sila, nga ang mga tawo didto mga kusgan ug ang ilang mga kalungSORan mga malig-on ug dagku kaayo. Miingon pa sila nga ang mga anak ni Anac nga nagpuyo didto mga higante. Unya gipahilum ni Caleb ang mga tawo sa atubangan ni Moises ug miingon, “Manungas dayon kita ug manag-iya niini, kay kita makahimo kaayo sa pagdaug kanila.”

Apan ang mga kalalakin-an nga mingtungas uban kaniya ming-ingon, “Dili kita makahimo sa pagtungas batok niadto nga katawhan; kay sila labi pang kusgan kay kanato,” Numeros 13. Nagbagulbol na usab ang mga tawo, niining maong panahon batok na kang Moises, Aaron ug kang Jehova. Sila nanghulga nga magpili sila ug laing pangulo ug mamalik sila ngadto sa Egipto. Si Moises ug si Aaron mihapa sa atubangan sa tibuok nga panagkatigum sa katilingban sa mga anak sa Israel. Si Josue ug si Caleb, kinsa kauban sa mga maniniid sa yuta, migisi sa ilang mga sinina. Ilang giingnan sila sa dili pagbatok ni Jehova ug dili sila mahadlok sa katawhan sa yuta. Apan ang tibuok katilingban misulay sa pagsalibay ug bato kanila, Numeros 14:1-10.

Unya ang himaya ni Jehova nagpakita diha sa balong-balong nga pagatiguman sa mga anak sa Israel. Si Jehova miingon kang Moises, “Hangtud anus-a nga magatamay Kanako kining katawhan? Ug hangtud anus-a nga sila dili motoo Kanako, tungod sa tanang mga ilhanan nga Akong gibuhat sa taliwala nila? Ako magapatay kanila uban ang hampak sa kamatayon, ug sila akong isalikway aron dili makapanunod, ug pagabuhaton ko ikaw nga usa ka nasud nga labi pang daku ug labi pang kusgan kay kanila,” Numeros 14:11-12. Si Moises nangamuyo nausab alang sa katawhan ug si Jehova mitubag ug miingon nga si Caleb ug si Josue lamang ang tugotan sa pagsulod sa Yuta sa Saad. Ang tanang uban gikan sa baynte (20) ang pangidaron pataas magalatagaw ug mangamatay diha sa kamingawan sulod sakwarenta (40) katuig. Ang napulo (10) nga mga maniniid nga dili matinoohon nangamatay pinaagi sa hampak – Numeros 14:13-38.

Ang Israel angayan nga malaglag tungod sa ilang pagkadilimatinoohon ug sa ilang sala. Sumala sa atong giya nga basahon, ang Bibliya, ang tanan mga tawo angayan nga malaglag. “Ang tanan nakasala,” Roma 3:23. “Ang suhol sa sala kamatayon,” Roma 6:23. Apan, “samtang mga makasasala pa kita, si Cristo nagpakamatay alang kanato,” Roma 5:8. Karon, Siya nabuhi aron sa pagpangaliyupo alang kanato, Hebreohanon 7:25. Si Cristo mao ang atong Tigpataliwala sa atubangan sa Amahan. Siya nagabarug taliwala kanato ug sa kasuko sa Dios sa sala. Aduna lamang *usa* ka Tigpataliwala ug kana mao si Jesu-Cristo, 1Timoteo 2:5-6. Gidala ni Cristo didto sa ibabaw sa krus ang angay nga silot sa sala, ug sa diha nga kita mosalig Kaniya ingon nga atong kaugalingong Manluluwas gikan sa impiyerno; ang Dios nakakita kanato diha kang Cristo.

Atong nakat-onan nga si Moises nahimo nga hulagway ni Cristo, tungod kay iyang gihulagway sa dili pa panahon ang buhat ingon nga usa ka tigpataliwala nga pagahimoon ni Cristo. Si Cristo lamang ang *bugtong* Tigpataliwala tali sa Dios ug sa tawo. Siya imo na bang Tigpataliwala?

SAG-ULOHON NGA BERSIKULO: “Kay adunay usa lamang ka Dios ug usa ka tigpataliwala sa Dios ug sa mga tawo, ang tawo nga si Cristo Jesus, nga naghatag sa iyang kaugalingon ingon nga lukat alang sa tanan, nga ang panghimatuod niini nahimo na sa gitagal nga panahon.” 1 Timoteo 2:5-6.

PAGTULON-AN 12 – BULOHATON

Ang Israel mipanaw human madawat nila ang Kasugoan. Atong nakita nga adunay mga silot nga nalambigit sa pagsupak sa Kasugoan.

Direksyon: Isulat sa blangko dinhi sa ubos ang mga tubag sumala sa Kasulatan.

Sala nga gibuhat

Silot sa sala

1. Numeros 11:1 _____.
2. Numeros 12:1 _____.
3. Numeros 14:11 _____.

Numeros 11:1 _____.

Numeros 12:10 _____.

Numeros 14:12 _____.

4. Unsa ang gibuhat ni Moises sa matag kahimtang nga nakaplagaan sa maong mga bersikulo:

Numeros 11:2

Numeros 12:13

Numeros 14:19

-
5. Si Moises ang tigpangamuyo o tigpataliwala sa nasuko nga Dios ug sa mga tawong makasasala. Unsa ang ngalan sa usa nga nabuhi sa kanunay aron sa pagpangamuyo/pag-ampo alang kanato? Hebreohanon 7:22-25. _____.
 6. Sulati ang mga hawan aron sa pagpakita ngano nga ang mga luwas nagkinahanglan kang Cristo nga mag-ampo kanila, 1 Juan 2:1. “Minahal kong mga anak, nagasulat ako niining mga butanga aron kamo dili _____ . Apan kon _____, kita adunay Manlalaban (tigpataliwala/tigpangamuyo) nga mangatubang sa Amahan, si Jesu-Cristo ang matarung.”
 7. Ngano man nga ang tanang tawo angayan silotan? Roma 3:23 _____.
 8. Unsay gibuhat ni Cristo samtang mga makasasala pa kita? Roma 5:8 _____.
 9. Sulati ang hawan sa mga bersikulo sa ubos aron sa pagpakita sa gamhanang buhat ni Ginoong Jesu-Cristo ingon nga Manluluwas.
Ang Iyang buhat alang sa mga *dili luwas*: 1 Timoteo 1:15 – Si Cristo Jesus mianhi sa kalibutan aron _____ sa mga makasasala.
Ang Iyang buhat alang sa mga luwas: Hebreohanon 7:25 – Siya makahimo sa _____ sa mga moduol sa Dios pinaagi Kaniya, kay Siya buhi sa kanunay aron sa _____ alang kanila.
 10. Isulat ang 1 Timoteo 2:5-6: _____.